

31 OCT 1996

Mahathir-Tilawah

NEGARA ISLAM TERUS TERIKAT JIKA SERING MINTA TOLONG BUKAN ISLAM

IPOH, 31 Okt (Bernama) -- Negara-negara Islam akan selama-lamanya terikat dengan kepentingan negara bukan Islam selagi mereka selalu meminta pertolongan daripada negara itu, kata Perdana Menteri Datuk Seri Dr Mahathir Mohamad.

"Oleh kerana negara-negara Islam selalu meminta pertolongan dan tunduk kepada negara-negara maju bukan Islam, maka agama Islam juga turut terhina," katanya ketika merasmikan Majlis Tilawah al-Quran peringkat kebangsaan ke-39 di Stadium Perak di sini malam ini.

Beliau berkata selagi negara Islam mundur, lemah dan memperdayakan diri dengan mendakwa kononnya mereka tidak perlu kemajuan di dunia, selama itulah Islam akan dihina dan negara-negara Islam diperkosa.

"Malangnya oleh kerana negara-negara Islam tidak maju, mereka kerap ditindas negara lain atau mereka terpaksa mencari perlindungan dari negara-negara lain yang mempunyai kemajuan," katanya.

Dr Mahathir berkata negara-negara Islam mudah dilaga-lagakan dengan negara Islam lain yang akhirnya menambahkan kelayakan mereka, dan apabila mereka bermusuhan sesama sendiri mereka sekali lagi mencari perlindungan dari negara maju bukan Islam.

Perdana Menteri berkata masyarakat Islam yang kuat dan maju dapat membantu menghapuskan anggapan bahawa Islam menjadi halangan terhadap kemajuan.

Beliau mengecam pendapat segolongan umat Islam bahawa kemajuan di dunia ini tidak perlu dikejar kerana kononnya kemajuan orang Islam berbeza dengan kemajuan yang ditafsirkan orang bukan Islam.

Pemikiran seperti itu, hanya menguatkan kepercayaan di kalangan sesetengah orang Islam bahawa mereka bukan sahaja tidak perlu maju tetapi tidak mungkin maju di dunia ini dan sehubungan dengan itu mereka tidak perlu mengejar kemajuan.

"Pada zaman pembangunan, termasuk zaman ledakan maklumat ini, agama menjadi lebih penting daripada pada zaman maklumat terhad dahulu kerana di samping maklumat yang membina, ada juga maklumat yang diterima hari ini bukan sahaja boleh melemah dan mengelirukan, malah boleh merosakkan akhlak dan budaya masyarakat.

"Ajaran agama dapat menjadi benteng untuk melindungi kita daripada kesan buruk maklumat yang tidak baik, dengan itu masyarakat kita akan terselamat dan akan terus membangun dan menjadi kuat," katanya.

Dr Mahathir berkata jika umat Islam di negara ini kembali kepada ajaran al-Quran mengenai pentingnya mereka mempertahankan diri, tentu mereka akan mengejar ilmu dan kemajuan yang akan membolehkan mereka menyediakan segala alat untuk mempertahankan diri mereka.

"Kita juga akan diperingati oleh al-Quran bagaimana kemiskinan itu boleh melemahkan akidah kita, dan kita juga akan diperingati bahawa orang Islam itu adalah bersaudara dan bukan musuh yang harus berperang setiap masa," katanya.

"Kita juga akan menolak keterlaluan dalam semua gerak-geri kita, pendek kata banyak pelajaran berkenaan dengan Ad-din atau cara hidup yang boleh dipelajari daripada al-Quran."

Beliau berkata tidaklah salah jika dikatakan masalah-masalah yang dihadapi umat Islam sekarang adalah kerana membelakangkan ajaran al-Quran dan mengutamakan ajaran dan tafsiran orang tertentu yang berkepentingan yang lebih mengutamakan agenda mereka daripada ajaran al-Quran.

Dr Mahathir berharap Tilawah al-Quran yang bertujuan untuk membaca ayat-ayat suci al-Quran tidak dijadikan semata-mata untuk halwa telinga tetapi lebih penting ialah mengikuti penjelasan makna ayat-ayat berkenaan supaya ia menjadi pengajaran kepada semua. -- BERNAMA

ZAB NMO